



指南後錄

14
604
8

卅



門 僧 4  
號 604  
卷 8

四  
十  
五  
冊

指南後錄

指南後錄序

德祐二年四月八日子自海道至温州時端宗  
皇帝於福州建大元帥府翊戴已定而位號未  
正予奉書勸進議遂決五月乙未朔登極改元  
景炎予以觀文殿侍讀召二十六日抵行都門  
除右丞相朝廷草創凡兵財調度樞密使陳宜  
中樞密副使張世傑實專之宰相具員也子辭  
不拜以樞密使同都督諸路軍馬卽日出南劍  
聚兵號召天下十月趨汀州遣督參趙時賞督



才下卷金 卷一  
諮趙孟滌以一軍取道石城復寧都遣督贊吳  
浚以一軍屯瑞金復雩都三年正月虜大入汀  
關不守予欲據城以拒敵汀守黃去疾聞車駕  
航海擁郡兵有異志子移次漳州龍巖縣賞滌  
還軍追及之於中途惟浚不至未幾浚命虜命  
來招諭人情洶洶浚乃定四月或行復梅州  
斬二大將之跋扈者以釁鼓始出江西贛重兵  
守雩都前軍克之開府興國縣七月督謀張汴  
監軍率賞滌等咸軍薄贛城下招諭使鄒鳳率

贛諸縣兵搗永豐吉水招撫使黎貴達率吉諸  
縣兵攻太和時贛惟存孤城吉八縣復其半  
臨洪諸郡豪傑送款無虛日大江以西有席  
卷包舉之勢福建斬僞天子黃從淮西兵復黃  
州復壽昌軍湖南所在起義兵不可勝數四方  
響應皆來聽命孔明有云漢事將成也天未悔  
禍相望旬日間贛吉日皆驚潰虜自隆興來適  
乘吾弊戰於廬陵方石嶺下我師不利及永豐  
空坑軍士解散妻子爲虜予收拾餘眾奉老母


入汀州又轉移循州將請命行朝益兵再舉會  
北使劉深自海至虜酋峻都自陸至道路梗塞  
朝命斷絕予駐循之南嶺柵險以自全黎貴達  
觀望有陰謀事覺伏誅二月進屯海濱訪車駕  
所在五月始聞端宗皇帝晏駕于化之榔州今  
上卽位改明年爲祥興已而加予少保封信國  
公職任如舊予奉詔泣泣不知所爲引兵東下  
冀一入覲爲張世傑所格不得進循至疾病攻  
擊老母 道之將廢豈不明甚有詔一再起

復大眾無所授予不得已流涕拜命潮士民數  
萬請移府於潮十一月至潮陽殪兇攻逆稍正  
天討使假以歲月因潮之人心阻山海之險增  
兵峙糧以立中興根本亦吾國之莒卽墨也適  
虜帥張弘範以水陸兵奄至予引避山谷行且  
數日虜輕騎直趨掩我不備於是被執當其被  
執時求死於鋒鏑不可得仰藥又不得死越七  
日至虜帥營予踊躍請劔曰此吾死所也虜帥  
必欲以禮見子謂吾不能跪吾嘗見伯顏阿述

長揖而已或曰柰何不拜予謂吾爲國死爾何拜爾爲虜知不能屈遂以平揖相見蓋歲除前三日也明年正月二日驅予下海舟十月至於厓山虜酋索書諭世傑降予謂我不能救父母反教人背父母可乎有死而已不能從也遂已間日虜帥謂予言國亡矣政使殺身爲忠孝誰復書之予謂商非不亡夷齊自不食周粟人臣各盡其心何論書與不書虜帥爲之改容日監視予惟謹以俟北方生殺之命乃四月一日使

臣還言虜主有誰家無忠臣之歎令善視予以來使予死於兵死於刑則已矣未得死所而萬里行役不得逃焉命也予自海道還國赤手起兵至於今三年江西之役大事幾集英雄無用武之地卒以困敗悲夫或謂予明知其不可爲而爲之柰何曰吾所謂盡心者人人諉天下之責古今世道不屬之人乎是烏可以成敗爲是非哉予在俘囚中多作詩以見志因名曰指南後錄予死無錄矣輒復序其說於右尙庶幾天

下後世有知予心者予死且不朽祥興初元四月既望文山履善甫序



入獄本末

予己卯歲十月初一日至幽燕初至立馬會同館前館人不受蓋謂館以受投拜人不受罪人也久之引去一小館置予於偏室館人不知次日晚供帳飲食如上賓館人云稟博羅丞相得言語云然初四日張元帥者始至初五日見其用事大臣言予不屈狀至午送予於兵馬司枷項縛手坐一空室衛防甚嚴所攜衣物錢糧官爲封識日給鈔一錢伍分爲飲食坐十餘日得

疾十一月初二日疏枷惟繫頸以鐵索得出戶負暄初五日赴樞密院院官不及見自是日赴院輒空歸至初九日院官始引見院官者博羅丞相張平章有所謂院判簽院者不能識也倨坐召見子入長揖通事曰跪予曰南之揖卽北之跪也吾南人行南禮畢可贊跪乎丞相叱左右曳予於地予坐不起數人者或牽頸或拏手或以足倚予背強作跪狀予動不自由則曰如此是刑法耳安所謂禮通事曰汝有何言予曰

天下有興有廢自古帝王以及將相滅亡誅戮何代無之文天祥今日終於宋氏社稷以至於此乞早作施行通事曰更有何語語止此乎予曰我爲宋相國亡職當死大國拏來法當死又何言丞相云你道有興有廢且道盤古王至今日是幾帝幾王我不理會得爲我逐一說予怒甚曰一部十七史從何處說起我今日非赴神童科非赴博學宏詞科不暇記言丞相媿乃云我知興廢故問及古今帝王且道古時曾有人



臣將城郭宗廟土地分付與別國了又逃去有此人否予曰丞相謂予前日爲宰相奉國而後去之耶奉國與人是賣國之臣也賣國者有所利爲之必不去去者非賣國者也我前日除丞相不拜奉使伯顏軍前尋被拘執已而有賊臣獻國國亡本當死所以不死者以度宗皇帝二子在浙老母在廣故爲去之之圖爾丞相曰德祐嗣君非爾君耶曰吾君也曰棄嗣君別立二王如何是忠臣曰德祐吾君也不幸而失國當

此之時社稷爲重君爲輕吾別立君爲宗廟社稷計所以爲忠臣也從懷愍而北者非忠從元帝爲忠從徽欽而北者非忠從高宗爲忠丞相語塞平章皆笑一人忽出來曰晉元帝宋高宗有來歷二王何所受命張平章曰二人是逃走底人立得不正是篡也予曰景炎皇帝乃度宗皇帝之長子德祐皇帝之親兄也如何是不正登極於德祐已去之後如何是篡陳丞相奉二王出宮具有太皇太后言語如何是無所受命

諸人無辭爭以無受爲解予曰天子之人予之雖無傳授之命推戴擁立亦無不可諸人但支離不報予曰仁者見之謂之仁知者見之謂之知各是其是可也丞相云你旣爲宰相若將三宮走方是忠臣不然則引兵出城與伯顏相公決勝負方是忠臣予曰此說亦是可責陳丞相不可以責我我不當國故也又曰你立二王做得甚功勞予曰國家不幸喪亡予立君以存宗廟存一日則盡臣子一日之責何功勞之有

曰旣知做不得何必做予曰人臣事君如子事父父不幸而有疾雖明知其不可爲豈有不下藥之理盡吾心焉耳不可救則天命也今日文天祥至此有死而已何必多言丞相都道不是丞相於是怒見之顏色云你要死我不教你便死禁持你予曰何必如此我以義死禁持何害也丞相愈怒云云通事亦不以轉告予不答遂呼獄吏云將下去別聽言語初十日冬至入暇予意滿假必見殺乃囚在獄中更無消息十二

月半後一令史報云丞相與獄官宣差烏馬兒云文丞相猶硬不硬又一日令史報云烏馬兒得博羅言語云遲數日更與丞相說話會歲終釋放諸囚烏馬兒語博羅說獄囚皆以寬放惟文丞相一人在獄博羅云我奏卻來喚你博羅至今重於一喚者憂吾之硬也予誓死決矣此行決死於再說話之頃昔人云薑桂之性到老愈辣予亦云金石之性要終愈硬性可改耶因記入獄一宗本末於此予死矣庶幾有知予心

者

右所記言語大略如此當時泛應尙多不能盡記己卯歲除日書

自古中興之君如少康遺腹之子起於一旅之成宣王承厲王之難匿於召公之家周召二相立以爲王幽王廢宜臼立伯服爲太子犬戎之亂諸侯迎立宜臼是爲平王漢光武起南陽爲帝蜀先主帝巴蜀皆是出推戴何論有無傳授之命如唐肅宗卽位靈武不稟命明皇初類於

篡然功在社稷天下後世猶無貶焉禹傳益不傳啓天下之人曰啓吾君之子謳歌朝覲獄訟歸焉漢文帝只是平勃諸人所立豈有高祖惠帝呂后之命邪春秋亡公子入爲君者何限齊桓晉文其大者也何謂逃走不當立可惜當時不會以此一段言語數陳頗有遺憾耳

羿之於夏莽丕之於漢方是篡德祐亡而景炎立謂之篡何居

指南後錄卷一上

過零丁洋

辛苦遭逢起一經千戈落落四周星山河破碎風飄絮身世漂流雨打萍皇恐灘頭記皇恐零丁洋裏歎零丁人生自古誰無死畱取丹心照汗青

上巳日張元帥令李過船請作書招

諭張少傅投拜遂與之言我自救父母不得乃教人背父母可乎書此詩遺之

李不能強持詩以達張但稱好人好詩  
竟不見逼

元夕

南海觀元夕茲遊古未曾人間大競渡水上小  
燒燈世事爭強弱人情卜廢興孤臣腔血滿死  
不愧廬陵

懷惠州弟

五十年兄弟一朝生別離鴈行長已矣馬足遠  
何之葬骨知無地論心更有誰親喪君自盡猶

子是吾兒

懷趙清逸

匡海知何地驅來坐戰場家人半分合國事決  
存亡一死不足道百憂何可當故人髯似戟起  
舞爲君傷

戰場

三年海嶠擁貔貅一日蹉跎白盡頭垓下雌雄  
羞故老長安咫尺泣孤囚魚龍沸海地爲泣烟  
雨滿山天亦愁萬死小臣無足憾蕩陰誰共侍

指南後錄

卷一上

二

中遊

哭厓山

寶藏如山席六宗樓船千疊水晶宮吳兒進退尋常事漢氏存亡頃刻中諸老丹心付流水孤臣血淚灑南風早來朝市今何處始悟人間萬法空

二月六日海上大戰國事不濟孤臣文天

祥坐北舟中向南慟哭爲之詩曰

長平一坑四十萬秦人歡欣趙人怨大風揚沙

水不流爲楚者樂爲漢愁兵家勝負常不一紛紛干戈何時畢必有天吏將明威不嗜殺人能一之厥角稽首二百州正氣埽地山川羞身爲大臣義當死城下師盟愧牛耳聞關歸國洗日光白麻重宣不敢當出師三年勞且苦咫尺長安不得覩非無虓虎出如林一時不戒爲人擒樓船千艘下天角兩雄相遭爭奮搏古來何代無戰爭未有鋒銳交滄溟遊兵日來復日往相持一月如鵠蚌南人志欲扶崑崙北人志欲黃

河吞一朝天昏風雨惡砲火雷飛箭星落誰雌  
誰雄勝負分流尸流血海水渾昨朝南船滿厓  
海今朝只有北船在昨夜兩邊桴鼓鳴今夜船  
船鼾睡聲北軍去家八千里椎牛醢酒人人喜  
惟有孤臣淚雨垂冥冥不敢向人啼六飛杳靄  
知何處大海茫茫隔煙霧我欲借劍斬佞臣黃  
金橫帶爲何人爲之歌曰  
颯風起兮海水飛噫文武盡兮火德微噫鷹鷂  
欲擊兮靡所施噫鴻鵠欲舉兮將安歸噫權歌

中流兮任所之噫抱春秋兮莫我知噫

言志

九垓化爲魅億醜俘爲虜旣不變姓名卒於吳  
又不自髡鉗奴於魯遠隱不如四皓翁高蹈不  
如仲連父冥鴻墮繪繳長鯨陷網罟鷄雀上下  
爭誰何螻蟻等閑相爾汝狼籍山河歲云杪飄  
零海角春重莫百年落落生涯盡萬里遙遙行  
役苦我生不辰逢百懼求仁得仁尙何語一死  
鴻毛或泰山之輕之重觀所處婦女低頭守巾

軀男兒嚼舌吞刀鋸殺身慷慨猶易勉取義從  
容未輕許仁人志士所植立橫絕地維屹天柱  
以身徇道不苟生道在光明照千古素王不作  
春秋廢獸蹄鳥跡交中土閭位適在三七間禮  
樂終當屬明主李陵衛律罪通天遺臭至今使  
人吐種瓜東陵不可得暴骨匈奴固其所平生  
讀書爲誰事臨難何憂復何懼已矣夫易學具不  
如會參結纓猶當效子路

自歎

海澗南風慢天昏北斗斜孤臣傷失國游子歎  
無家客館身如寄征衣鬢欲華越王臺上望幽  
朔在天涯

南涯

竭來南海上人死亂如麻腥浪拍心碎颼風吹  
鬢華一山復一水無國又無家男子千年志吾  
生未有涯

有感

海澗龍深蟄山空鳥雜鳴花隨春共去雲與水



俱行壯士千年志征夫萬里程夜涼看北斗何處是攬槍

張元帥謂子國已亡矣殺身以爲忠誰復書之予謂商非不亡夷齊自不食周粟人臣自盡其心豈論書與不書張爲改容因成一詩

高人名若浼烈士死如歸智滅猶吞炭商亡正採薇豈因微後福其肯蹈危機萬古春秋義悠悠雙淚揮

登樓

茫茫地老與天荒如此男兒鐵石腸七十日來浮海道三千里外望江鄉高鴻尙覺心期濶塞馬何堪腳債長獨自登樓時拄頰山川在眼淚浪浪

海上

天邊青鳥逝海上白鷗馴王濟非癡叔陶潛豈醉人得當須報漢可隱卽逃秦身事蓋棺定挑燈看劍頻

虎頭山

豈不逃秦帝終然陷楚囚故園春草夢舊國夕陽愁妾婦生何益男兒死未休虎頭山下路揮淚憶虔州

吾以春秋之義不得死懼斯文之不傳而心事之湮沒也惠州教授謝國史崔老博雅自好守正不污故以此卷授之吾雖死是心表白於當世復何憾哉  
指南後錄卷一上終

指南後錄卷一下

出廣州第一宿

越王臺下路搔首歎萍蹤城古都沿水山高易得風鼓聲殘雨後塔影莫林中一樣連營火山同河不同

英德道中

海近山如沃村深屋半燕乾坤正風雨軒冕總泥塗自歎鳶肩薄誰憐鶴影孤少年狂不醒夜夜夢伊吾

指南後錄 卷二  
晚渡  
青山圍萬疊流落此何邦  
雲靜龍歸海風清馬  
渡江汲灘供茗椀編竹當篷窗  
一片沙頭月羈鴻共影雙

珊瑚吟

南方有珍禽鳴聲天下奇  
毛羽黑如漆兩臉凝瓊脂  
燕趙佳公子籠檻以自隨  
童子重丁寧飲食必以時  
將獻上林苑來巢萬年枝  
待之豈少恩不免加繫維  
珊瑚真珊瑚碎啄良自悲  
中原

寒氣深風土非所宜

上冢吟

湘人有登科初授武岡尉  
單車赴官名家正擇壻尉本有室  
隱其實而取焉官滿隨婦翁入京  
自是舍桑梓棄墳墓終身不歸後  
官至侍從其糟糠妻居母家不復  
嫁歲時爲夫家上冢婦禮不廢  
鄧中甫作古詩一首曰上冢吟某  
讀爲之感慨因更廣其韻賦五言云

子昔從君時堂上拜姑嫜相攜上古冢歲時持  
酒漿姑嫜相繼沒馬鬣不在鄉共君甌孟飯清  
淚流襦裳君貧聊復官有家不得將妾無應門  
兒松檟自成行君別不復歸歲月何茫茫長安  
擁朱綬執鴈事侯王豈無一紙書道路阻且長  
年年醉寒食妾心良自傷君家舊巾幘至今襲  
且藏諒君霜露心白首遙相望

生日

客中端二日風雨送牢愁昨歲猶潘母今朝更

楚囚田園荒吉水妻子老幽州莫作長生祝吾  
謀在首邱

和中甫端午韻不依次

黃茅古道外羸馬發南州有客嗤齊虜何人念  
楚囚歲年付流水風雨滿滄洲手把菖蒲 黑  
頭非所求

又呈中齋

風雨羊腸道飄零萬死身牛兒朝共載木客夜  
爲鄰庾子江南夢蘇郎海上貧悠悠看晚渡誰

是濟川人

又

萬里論心晚相看  
慰亂離丹成俄已化  
壁碎尙無緇禾黍  
西京夢川原落日悲  
斯文今已矣來世以爲期

竹

倦來聊歇馬隨分此青山  
流水竹千箇清風沙一灣  
乾坤醒醉裏身世有無間  
客真希絕浮生半日閑

越王臺

登臨我向亂離來  
落落千年一越臺  
春事暗隨流水去  
潮聲空逐暮天回  
煙橫古道人行少  
月墮荒村鬼哭哀  
莫作楚囚愁絕看  
舊家歌舞此銜杯

南華山

北行近千里迷復忘  
西東行行至南華  
忽忽如夢中佛化知  
幾塵患乃與我同  
有形終歸滅不滅  
惟真空笑看曹溪  
水門前坐松風

六祖禪師真身蓋數百年矣爲亂兵割  
其心肝乃知有患難佛不能免況人乎  
南安軍

梅花南北路風雨溼征衣出嶺誰同出歸鄉如  
不歸山河千古在城郭一時非餓死真吾志夢  
中行採薇

贛州

滿城風雨送淒涼三四年間此戰場遺老猶應  
愧蜂蟻故交久已化豺狼江山不改人心在宇

宙方來事會長翠玉樓前天亦泣南音半夜落  
滄浪

黃金市

閉篷絕粒始南州我過青山欲首邱巡遠應無  
兒女態夷齊肯作稻梁謀人間早見黃金市天  
上猶遲白玉樓先子神遊今二紀夢中揮淚濺  
松楸

萬安縣

青山曲折水天平不是南征是北征舉世更無

巡遠死當年誰道甫申生遙知嶺外相思處不見灘頭皇恐聲傳語故園猿鶴好夢回江路月風清

太和

書生曾擁碧油幢恥與羣兒共豎降漢節幾回登快閣楚囚今度過澄江丹心不改君臣誼清淚難忘父母邦惟恐鄉人知我瘦下帷絕粒坐篷窗

蒼然亭

風打船頭繫夕陽亭前老子舊胡牀青牛過去關山動白鶴歸來城郭荒忠節風流落塵土英雄遺恨滿滄浪故園水月應無恙江上新松幾許長

祭墓文

維己卯五月丁未朔越二十有六日壬申孝子文某自嶺被執北行至南安軍謹具香幣遣人馳告於先考太師革齋墓下嗚呼誰不爲臣而我欲盡忠不得爲忠誰不爲子而我欲盡孝不

得爲孝天乎使我至於此極耶始我起兵赴難  
勤王仲弟將家遁於南荒宗廟不守遷我異疆  
大臣之義國亡與亡靈武興師邂逅歸國再相  
出師身荷憂責江西之役義聲四克謂親拜墓  
以剪荆棘不虞垂集一跌崎嶇妻妾子女六人  
爲俘收拾散亡息於海隅庶幾奮厲以爲後圖  
惡運推亡天所廢棄有母之喪尋失適子哭泣  
未乾敵臨其壘倉皇之間二女天逝翦爲囚虜  
形影獨存仰藥不濟竟北其轅繫足繫頸過我

里門望墓 恨不九京爰指松楸有言若誓  
繼今支子實典祀事有姪曰升我身是嗣興言  
及此淚血如水嗚呼自古危亂之世忠臣義士  
孝子慈孫其事之不能兩全也久矣我生不辰  
逢此百凶求仁得仁抑又何怨幽明死生一理  
也父子祖孫一氣也冥漠有知尙哀鑒之

別里中諸友

青山重回首風雨暗啼猿楊柳溪頭釣梅花石  
上尊故人無復見烈士尙誰言長有歸來夢衣



冠滿故園

予始至南安卽絕粒爲告祖禰文別諸友詩遣孫禮取黃金市登岸馳歸約六月二日復命於吉城下予以心事白諸幽明卽瞑目長往含笑入地矣乃水盛風駛前一日達廬陵孫禮期不至予且行忍死以待垂至豐城忽有見孫禮於他舟乃悟竟不曾往爲之痛哭流涕暮始見主者取孫禮還舟明早已送之豐

城岸縱其自便追之不可及矣予至是不食已八日若無事然私念死廬陵不失爲首邱今使命不達委身荒江誰知之者蓋少須臾以就義乎復飲食如初昔讀左傳申包胥哭秦庭七日勺飲不入口亦不聞有他乃知餓踣西山非一朝夕之積也予嘗服腦子二兩不死絕食八日又不死竟不曉其何如從者七人或逃或死或逐今僅存一人曰劉榮

楚囚之沉宜哉

發吉州

己卯六月初一日蒼然亭下楚囚立山河顛倒  
 紛雨泣乙亥七夕此何夕煌煌牛斗劍光溼戈  
 鋌彗雲雷電擊三百餘年火為德須臾風雨天  
 地黑皇綱解紐地維折妾婦偷生自為賊英雄  
 扼腕怒鬚赤貫日血忠死窮北首陽風流落南  
 國正氣未亡人未息青原萬丈光赫赫大江東  
 去日夜白

臨江軍

江岸今多嚙城居昔屢焚市人半僮豎子亦  
 將軍蛟泣金洲雨猿啼玉觀雲周郎墳上土回  
 首淚成痕

隆興府

半生幾度此登臨流落而今雪滿簷南浦不知  
 春已晚西山但覺日初陰誰憐塞鶴千年語空  
 負鵬鯤萬里心無限故人簾雨外夜深如有廣  
 陵音

湖口

江湖一都會宇宙幾興亡走馬蘆林外賣魚茅  
舍傍南人撐快槳北客坐危檣江水交岷水東  
流日夜長

安慶府

風雨宜城路重來白髮新長江還有險中國自  
無人梟獍畱蕃種鱷鯨蟄怒鱗泊舟休上岸不  
忍見遺民

池州

五老湖光遠九華山色昏南冠前進士北部舊  
將軍芳草江頭路斜陽郭外村恩恩十年夢故  
國黯消魂

魯港

方誇金塢築豈料玉牀搖國體真三代江流舊  
六朝鞭投能幾日瓦解不崇朝千古燕山恨西  
風捲怒潮

采石

不上蛾眉二十歲重來為墮山河淚今人不見

虞允文古人曾有樊若水長江闊處平如驛況此介然衣帶窄欲從謫仙捉月去安得然犀照神物

建康

金陵古會府南渡舊陪京山勢猶盤礴江流已變更健兒徙幽土新鬼哭臺城一片清溪月偏於客有情

金陵驛

草合離宮轉夕暉孤雲飄泊復何依山河風景

元無異城郭人民半已非滿地蘆花和我老舊家燕子傍誰飛從今別卻江南去化作啼鵲帶血歸

萬里金甌失壯圖衮衣顛倒落泥途空流杜宇聲中血半脫驪龍頷下珠老去秋風吹我惡夢回寒月照人孤千年成敗俱塵土消得人間說丈夫珠亦作鬚

懷楊忠襄

平生王佐心世運蹈衰末齊虜誰復楚囚詎

當脫金陵雖懷古尚友在風烈衰忠後遺廟夫子我先達

早秋

隻影飄零天一涯千秋搖落欲何之朝看帶緩可憐瘦夜怯衾單始覺衰眼裏遊從驚死別夢中兒女慰生離六朝無限江山在搔首斜陽獨立時

睡起

空堂孤影起聞雞風送高樓鼓角悲江海無情

遊子倦歲年如夢美人遲平生管葛成何事千古夷齊在一時坐久月斜庭木落浮雲滅沒漏朝曦

中秋

不教收骨瘴江邊驅向胡沙著去鞭舊奪宮袍空獨步新餐官飯飽孤眠客程恰與秋俱半人影何如月倍圓猶是江南佳麗地徘徊把酒看蒼天

南康軍和東坡酌江月

廬山依舊淒涼處無限江南風物空翠晴嵐浮  
汗漫還障天東半壁鴈過孤峰猿歸老嶂風急  
波翻雪乾坤未歇地靈尙有人傑堪歎飄泊  
孤舟河傾斗落客夢催明發南浦閑雲連草樹  
回首旌旗明滅三十年來十年一過空有星星  
髮夜深愁聽胡笳吹徹寒月

和中齋韻 過吉作

功業飄零五丈原如今局促傍誰轅  
明妃淚啼血南飛望帝魂骨肉凋殘惟我在形

容變盡只聲存江流千古英雄恨  
蘭作行舟柳作樊

再和

見說黃沙接五原飄零隻影向南轅  
江山有恨銷人骨風雨無情斷客魂  
淚似空花千點落鬢如碩果數根存  
肉飛不起真堪歎江水爲籠海作樊

和友人

落落南冠過故都近來我意亦忘吾  
騎來驛馬

身如寄遣去家書字亦無景伯未囚先立後嵇  
康縱死不為孤江南只有歸來夢休問田園蕪  
不蕪

驛中言別友人

水天空闊恨東風不惜世間英物蜀鳥吳花殘  
照裏忍見荒城頽壁銅雀春晴金人秋淚此恨  
憑誰雪堂堂劔氣斗牛空認奇傑 那信江海  
餘生南行萬里扁舟齊發止為鷗盟畱醉眼細  
看濤生雲滅睨柱吞羸回旗走懿千古衝冠髮

伴人無寐秦淮應是孤月

和

乾坤能大算蛟龍元不是池中物風雨牢愁無  
著處那更寒蛩四壁橫梨題詩登樓作賦萬事  
空中雪江流如此方來還有英傑 堪笑一葉  
飄零重來淮水正涼風新發鏡裏朱顏都變盡  
只有丹心難滅去去龍沙向江南回首青山如  
髮故人應念杜鵑枝上殘月

懷中甫

時中甫以病畱金陵天慶觀

久要何落落末路重依依風雨連兵幕泥塗滿  
客衣人間龍虎變天外燕鴻遲死矣煩公傳北  
方人是非

行宮 中齋作

十里宮牆一聚塵天津晚過客愁新花啼杜宇  
歸來血樹掛蒼龍脫去鱗福德倘存終有晉秣  
陵未改已無秦秋風禾黍何南北見說銅駝會  
笑人 晉索靖指宮門銅駝曰  
會見汝在荆棘中耳  
怪底秦淮一水長幾多客淚灑斜陽江流本是

限南北地氣何曾減帝王臺沼漸荒基歷落鶯  
花猶在意淒涼青天畢竟有情否舊月東來失  
女牆 城上小牆城  
上窺人者

早秋

寒魄澹元河商飈慄明發羈人坐環堵壯士衣  
穿褐晉陵誰復新秦陵尙云秣夫君百世心患  
不在飢渴

廣齋謂柳山和王昭儀滿江紅韻惜未見  
之爲賦一闋 中齋  
作



王母仙桃親會醉九重春色誰信道鹿銜花去  
浪翻鰲闕眉鎖嬌蛾山宛轉髻梳墮馬雲欹側  
恨風沙吹透漢宮衣餘香歇霓裳散庭花滅  
斜陽燕應難說想春深銅雀夢殘啼血空有琵琶  
傳出塞更無環珮鳴月又爭知有客夜悲  
歌壺敲缺

和王夫人滿江紅韻以庶幾后山妾薄命  
之意

燕子樓中又睚過幾番秋色相思處青年如夢

乘鸞仙闕肌玉暗銷衣帶緩淚珠斜透花鈿側  
最無端蕉影上窗紗青燈歇曲池合高臺滅  
人間事何堪說向南陽阡上滿襟清血世態便  
如翻覆雨妾身元是分明月笑樂昌一段好風  
流菱花缺

代王夫人作

試問琵琶胡沙外怎生風色最苦是姚黃一朵  
移根仙闕王母歡闌瓊宴罷仙人淚滿金盤側  
聽行宮半夜雨淋鈴聲聲歇彩雲散香塵滅

銅駝恨那堪說想男兒慷慨嚼穿齧血回首昭陽離落日傷心銅雀迎新月算妾身不願似天家金甌缺

王夫人詞

太液芙蓉全不是舊時顏色嘗記得恩承雨露玉階金闕名播蘭簪妃后裏暈潮蓮臉君王側忽一朝鞞鼓揭天來繁華歇龍虎散風雲滅今古恨憑誰說顧山河百二淚流襟血驛館夜驚塵土夢宮車曉轉關山月若姮娥於我肯相

容從圓缺

王夫人至燕題驛中云云中原傳誦惜未句欠商量

浪淘沙

中齋

疏雨洗天晴枕簟涼生井梧一葉做秋聲誰念客身輕似葉千里飄零夢斷古臺城月淡潮平便攜酒訪新亭不見當時王謝宅烟草青青

東海集序

東海集者友人客海南以來詩也海南詩而曰東海集者何魯仲連天下士友人之志也友人自為舉子時已大肆力於詩於諸大家皆嘗登

其門而涉其流其本贍其養銳故所詣特深到  
余嘗評其詩渾涵有英氣鍛煉如自然美則美  
矣猶未免有意於爲詩也自喪亂後友人挈其  
家避地遊宦嶺海而全家燬於盜孤窮流落困  
頓萬狀然後從予匡山除禮部侍郎且權直學  
士矣會南風不競御舟漂散友人倉卒蹈海者  
再爲北軍所鈞致遂不獲死以至於今凡十數  
年間可驚可愕可悲可憤可痛可悶之事友人  
備嘗無所不至其慘戚感慨之氣結而不信皆

於詩乎發之蓋至是動乎情性自不能不詩杜  
子美夔門柳子厚柳州以後文字也予與友人  
年相若又同里閨以斯文相好然平生落落不  
相及及居楚囚中而友人在行同患難者數月  
其自五羊至金陵所賦皆予目擊或相唱和語  
予坐金陵驛無所作為乃取友人諸詩筆之於  
書與相關者并附焉後之覽者因詩以見吾二  
人之志其必有感慨於斯己卯七月壬申文天  
祥敘

送中齋 三首

秋氣晚正烈客衣早知寒把衣不能別更盡此  
日歡出門一萬里風沙浩漫漫豈無兒女情爲  
君忍汎瀾百年有時盡千載無餘觀明明君臣  
義公獨爲其難願持丹一寸寫入青琅玕會有  
撫卷人孤燈起長歎

又

神龍蕩失水馴擾終未得威鳳雖在藪肯顧鷄  
鶩食所以古之人受變心不易毫鼎已遷周西

山竟飢瘠豫子身自漆萇弘血成碧何嘗怨廢  
興而或貳心跡堅白不在緇羔衷良自惜此誼  
公素明俗見或未識

又

嗟予抱區區疇昔同里閭過從三十年知心不  
知面零落忽重逢家亡市朝變婢媵蹈海餘踽  
踽南冠殿劇談泥塗際握手鞍馬倦依依斯文  
意若恨十年晚魯仲偶不逢隨世本非願靈胥  
目未扶端欲詣所見及茲萬里別一夕腸百轉

余生諒須臾孤感橫九縣庶幾中尉事萬一中丞傳

此冊為指南後錄第一卷下第二卷起  
八月二十四日發建康終歲除有感尚  
有零丁洋諸詩及後錄本在惠州合錄  
第一卷而所恨者指南前錄敘號存而  
詩已不完侍郎弟姑據所存本使本不  
泯於世一聯半句使天下見之識其為  
人即吾死無憾矣況篇帙之多乎歲在

庚辰正月二日文山履善甫書

指南後錄卷一下終

指南後錄卷二

予後錄詩以廣州至金陵為第一卷今  
入淮以後為第二卷云

發建康 八月二十四日

賞心亭下路拍手唱吾歌樓外梁時塔城中秦  
氏河江山如夢耳天地奈愁何回首清溪雨長  
江一鴈過

江行有感 二十五日

蒲萄肥汗馬荆棘冷銅駝巫峽朝雲溼洞庭秋

水波窮愁空突兀清淚自滂沱莫恨吾生悞江  
東才俊多

真州驛 二十七日

山川如識我故舊更無人俯仰干戈跡往來車  
馬塵英雄遺算晚天地暗愁新北首燕山路淒  
涼夜向晨

望揚州

阮籍臨廣武杜甫登吹臺高情發慷慨前人後  
人哀江左遭陽運銅駝化飛灰二十四橋月楚

囚今日來

維揚驛

三年別淮水一夕宿揚州南極山川古北風江  
海秋昭君愁出塞王粲怕登樓千載英雄淚如  
今況楚囚

過邵伯鎮 二十八日

今朝車馬地昔日戰爭場我有揚州鶴誰存邵  
伯棠一灣流水小數畝故城荒回首江南路青  
山斷夕陽

高郵懷舊 二十九日

借問曾遊處高沙第幾山  
潛行鷹攫道直上虓  
當關一命虛空裏三年瞬息間  
自憐今死晚何復望生還

發高郵 三十日

初出高沙門輕舫遠城樓  
一水何曲折百年此  
綢繆北望渺無際飛鳥翔平疇  
寒蕪迷荒落日薄行人愁  
行行行湖曲萬頃涵清秋  
大風吹檣倒如盪彭蠡舟  
欲寄故鄉淚使入長江流  
篙人

爲我言此水通淮頭前與黃河合同作滄海  
漚跼蹶忽失意拭淚淚不收吳會日已遠回首重  
悠悠馳驅梁趙郊壯士何離憂吾道久已東陸  
沈古神州我今戴南冠何異有北投不能裂肝  
腦直氣摩斗牛但願光岳合休明復商周不使  
殊方魄終爲異物羞

寶應道中

天闊搏南鴈淮肥長北驅甘棠成傳舍細柳作  
康衢田海隨時變山河往日殊征袍共袞繡夜



壁一燈孤

淮安軍 九月一日

楚州城門外白楊吹悲風  
纍纍死人塚死向鋒  
鏑中豈無匹婦冤定無  
萬夫雄中原在其北登  
城望何窮

過淮河宿闕石有感

北征垂半年依依只南土  
今晨渡淮河始覺非  
故宇江鄉已無家三年一  
羈旅龍朔在何方乃  
吾妻子所昔也無奈何忽  
已置念慮今行日已

近使我淚如雨我為綱常謀  
有身不得顧妻兮  
莫望夫子兮莫望父天長  
與地久此恨極千古  
來生業緣在骨肉當如故

發淮安

九月初二日

九月初二日車馬發淮安  
行行重行行天地何不寬  
煙火無一家荒草青漫漫  
恍如泛滄海身坐玻瓈盤  
時時逢北人什伍扶征鞍  
云我戍江南當軍身屬官  
北人適吳楚所憂地少寒  
江南有遊子風雪上燕山

小青口 初三日

乍見驚胡婦相遙遇楚兵北來鴻鴈密南去駱  
駝輕芳草中原路斜陽故國情明朝五十里錯  
做武陵行

桃源道中 初四日

漠漠地千里垂垂天四圍隔溪胡騎過傍草野  
雞飛風露吹青笠塵沙薄素衣吾家白雲下卻  
伴北人歸

桃源縣

清野百年久中原千里賒人煙新聚落山水舊  
生涯種麥十數畝誅茅千百家我來行正倦何  
處覓桃花

崔鎮驛

萬里中原役北風天正涼黃沙漫道路蒼耳滿  
衣裳野闊人聲小日斜駒影長解鞍身似夢游  
子意茫茫

發崔鎮

高雁空秋興寒蟻破曉眠淡煙白似海野水碧

於天興廢嗟何及行藏信自然南人乍騎馬北  
客半乘船

發宿遷縣

夜夢入星槎曉行隨斗柄衣煖露自乾鬢寒冰  
欲凝將軍戴鐵笠壯士敲金鐙白眼睨青天我  
生不有命

望邳州 初六日

中原行幾日今日纔見山問山在何處云在徐  
泗間邳州山邳州水項籍不還韓信死龍爭虎

鬪不肯止煙草漫漫青萬里古來劉季號英雄  
樊崇至今已千歲

徐州道中 初七日

彭城古官道日中十馬馳咫尺不見人撲面黃  
塵飛向來漢王縞素師美人燕罷項羽歸一時  
混戰四十萬天昏地黑睢水湄乃知揚沙大風  
失白晝自是地利非天時漢王倉皇問道西一  
兒一女嘻其危太公呂后去不歸俎上寧有生  
還時未央稱壽太上皇巍然女媧帝中闈終然

富貴自有命造化顛倒真小兒

彭城行 徐州彭城縣

連山四圍合呂梁貫其中河南大都會故有項  
王宮晉牧連揚豫虎視北方雄唐時燕子樓風  
流張建封西望睢陽城只與汴水通太平黃樓  
賦尙能想遺風爾來百餘年正朔歸江東遺民  
死欲盡莽然狐兔叢我從南方來停驂撫遺踪  
故河蓄潢潦荒城翳秋蓬淒涼戲馬臺憔悴巨  
佛峰滄海變蒼白陵谷代不同朝為朱門貴暮

作行旅窮乘除信物理感慨係所逢古來賢達  
人一醉萬慮空如此獨醒何悲風送征鴻

燕子樓

自別張公子嬋娟不下樓遂令樓上燕百歲稱  
風流我遊彭城門來弔楚王關問樓在何處城  
東草如雪蛾眉代不乏埋沒安足論因何張家  
妾名與山川存自古皆有死忠孝長不沒但傳  
美人心不說美人色

戲馬臺

九月初九日客遊戲馬臺黃花弄朝露古人化  
飛埃今人哀昔人後人復今哀世事那可極淚  
落茱萸杯

發彭城

今朝正重九行人意遲遲回首戲馬臺野花發  
歲蕪草埋范增墓雲現樊噲旗時節正如此道  
路將何之我愛陶淵明甲子題新詩白衣送酒  
來把菊臥東籬

沛歌

山東滕州沛縣初九日

秦世失其鹿豐沛發龍顏王侯與將相不出徐  
濟間當時數公起四海王氣閑至今尙想見虹  
光照人寰我來千載下弔古淚如潛白雲落荒  
草隱隱芒碭山黃河天下雄南去不復還乃知  
盈虛故天道如循環盧王舊封地今日殺函關

歌風臺

長陵有神氣萬歲光如虹有時風雲變魂魄來  
沛宮壯哉游子鄉一覽萬宇空擊筑戒復隍帝  
業慎所終重瞳愛梁楚此情豈不同錦衣絢行

畫丈夫何淺中緬懷首邱意自足分雌雄尚惜  
霸心存慷慨勇功不見往 事烹狗與藏弓  
早知致兩生禮樂三代隆匹夫事已往安用責  
乃翁我來湯沐邑白楊吹悲風永言三侯章隱  
隱聞兒童葉落皆歸根飄零獨秋蓬登臺共悽  
惻目送南飛鴻

固陵道中

九天雲下垂一雨作秋色塵埃化泥途原野轉  
蕭瑟十里一雙猴狐兔臥荆棘見說數年來中

州乍蘇息

又

茅舍荒涼舊固陵漢王城對楚王城徐州烟火  
連豐沛天下還來屋角爭

又

固城陵下兩龍爭不見齊王來會兵勒取河山  
新分地項王之後到韓彭

發魚臺

晨吹發魚臺碎雨飛擊面團團四野周冥冥萬

象變疑是江南山煙霧昏不見豈知此中原今  
古經百戰英雄化爲土飛霧灑郊甸天寒日欲  
短游子淚如霰

自歎

瑟瑟秋風悲烈烈寒氣騎蒲柳先已零松柏何  
後凋天意重肅殺造物無不銷強弱有異稟憂  
患同一朝惟有南山石千歲一岿堯人苦不自  
足空羨王子喬

遠遊

黃河流活活太行高巍巍十二山以東百二山  
以西鄒魯盛文獻燕趙多雄姿右摩泰山牒左  
躡函谷泥邾鄆弔周公曲阜拜宣尼或登廣武  
歎或上北邙隱平生幾緲屐汗漫以爲期絕交  
天下士要爲男子奇吳會偏王業中原隔遺黎  
安得與黃鶴比翼天上飛江河異風景擊楫感  
且歛陽運遭百六興否俄推移桑田變滄海楚  
囚發孔悲我不檻車客爲我解縶維青蠅附天  
驥萬里相追隨人生尙行樂矧復新相知周道

思下泉王風懷黍離富貴豈不願憂患那得持  
人生危且淺忽若朝露晞長恐折我軸中道歎  
差池去我父母邦我行且遲遲聽我遠遊曲寄  
我長相思

六歌

有妻有妻出糟糠自少結髮不下堂亂離中道  
逢虎狼鳳飛翩翩失其凰將雛一二去何方豈  
料國破家亦亡不忍舍君羅襦裳天長地久終  
茫茫牛女夜夜遙相望嗚呼一歌兮歌正長悲

風北來起徬徨  
有妹有妹家流離良人去後攜諸兒北風吹沙  
塞草萋窮猿慘淡將安歸去年哭母南海湄三  
男一女同歔歔惟汝不在割我肌汝家零落母  
不知母知豈有瞑目時嗚呼再歌兮歌孔悲鶴  
鶴在原我何爲  
有女有女婉清揚大者學帖臨鍾王小者讀字  
聲琅琅朔風吹衣白日黃一雙白璧委道傍鴈  
兒啄啄秋無梁隨母北首誰人將嗚呼三歌兮



指南後錄 卷二  
歌愈傷非爲兒女淚淋浪  
有子有子風骨殊釋氏抱送徐卿雛四月八日  
摩尼珠榴花犀錢絡綉襦蘭湯百沸香似酥歛  
隨飛電飄泥途汝兄十三騎鯨魚汝今三歲知  
在無嗚呼四歌兮歌以吁燈前老我明月孤  
有妾有妾今何如大者手將玉蟾蜍次者親抱  
汗血駒晨妝靚服臨西湖英英鴈落飄瓊瑤風  
花飛墜鳥嗚呼金莖沆漑浮汙渠天摧地裂龍  
鳳俎美人塵土何代無嗚呼五歌兮歌鬱紆爲

爾迎風立斯須

我生我生何不辰孤根不識桃李春天寒日短  
重愁人北風隨我鐵馬塵初憐骨肉鍾奇禍而  
今骨肉相憐我汝在北兮嬰我懷我死誰當收  
我骸人生百年何醜好黃梁得喪俱草草嗚呼  
六歌兮勿復道出門一笑天地老

發潭口 十三日

吹面北風來拂鬢堅冰至軒冕委道途袞繡易  
羶毳百年雜醜好始酬四方志浩歌激浮雲亭

亭復攬轡義馭幾層停誰當埽幽翳

新濟州

借問新濟州徐鄆兄弟國昔爲大河南今爲大  
河北垂雲陰萬里平原望不極百草盡枯死黃  
花自秋色時時見桑樹青青雜阡陌路上無人  
行煙火渺蕭瑟車轍紛縱橫過者臨歧泣積潦  
流交衢霜蹄破叢棘江南寒未深銅鑪獸花赤  
焉知行路人鐵冷衣裳溼

汝陽道中

東平路汝陽縣十四日

積雨不肯霽行陸如涉川青氈繚我後白氈覆  
我前我欲正衣冠兩手如絆纏飛沫流被面代  
我泣涕漣鴻鴈紛南翔遊子北入燕平楚渺四  
極雪風迷遠天昔聞濟上軍又說汝陽田我今  
履其地弔古愴蒼煙男兒欲了事長虹射寒泉  
葬無主墓碑

風雨中見道傍一碑題云葬無主墓碑  
之記乃大宋戊申所立雨水淋漓字畫  
漫滅惜不得下馬亟讀之也

路逢一石碑亭亭傲風雨停驂髣髴看云是無  
主墓末書戊申歲屈指九十秋是時龍渡江甲  
子恍一周借問葬者誰承平百世祖亦有周餘  
民戰骨委黃土太祖下江南誓不戮一人神孫  
再立國天以報至仁大河流血丹屠毒誰之罪  
關忽不守皇皇依沛蔡螳蜋知捕蟬不知黃  
雀來今古幾興廢爲重生人哀

汝陽館

去歲營船隩今朝館汝陽海空沙漠漠河廣草

茫茫家國哀千古男兒慨四方老槐秋雨暗孤  
影照淋浪

自汝陽至鄆 十五日

渺渺中原道勞生歎百非風雨吹打人泥淖飛  
上衣日力去天短心事與時違 子昔相魯侵  
疆自齊歸

東平館

憔悴江南客蕭條古鄆州雨聲連五日月色徹  
中流萬里山河夢千年宇宙愁欲鞭劉豫骨煙

草暗荒邱

發鄆州喜晴

烈風西北來萬竅號高秋宿雲蔽層空浮潦迷  
中州行人苦沮洳道路阻且修流漸被鞍鞿飛  
沫綴衣裘昏鴉接翅落原野慘以愁城郭何蕭  
條閉戶寒颼颼中宵月色滿餘光散衾裯余子  
戒明發飛霧霽郊邱微見扶桑紅隱隱如沈浮  
身遊大荒野海氣吹蜃樓須臾劃當空六合開  
沈幽千年厭顏色蒼翠光欲流大陽經天行大

化不暫留輝光何曾滅晡霽終當收巖霜下百  
草長歌夜悠悠明日東阿道方軌驟驂驪

發東阿 東阿縣十七日

東原深處所時或見人煙秋雨桑麻地春風桃  
李天貪程頻問喉怯馬緩加鞭多少飛橋過噫  
吁是虜船

宿高唐州 博州

早發東阿縣暮宿高唐州哲人達幾微志士懷  
隱憂山河已歷歷天地空悠悠孤館一夜宿北

風吹白頭

平原 十八日

平原太守顏真卿長安天子不知名一朝漁陽  
 動鼙鼓大河以北無堅城公家兄弟奮戈起一  
 十七郡連夏盟賊聞失色分兵還不敢長驅入  
 咸京明皇父子將西狩由是靈武起義兵唐家  
 再造李郭力若論牽制公威靈哀哉常山慘鉤  
 舌心歸朝廷氣不懾崎嶇坎坷不得志出入四  
 朝孝忠節當年幸脫安祿山白首竟陷李希烈

希烈安能遽殺公宰相盧杞欺日月亂臣賊子  
 歸何處茫茫煙草中原土公死於今六百年忠  
 精赫赫雷行天

獻州道中

三年戎服行五嶺立王會躋攀上岨磴厲揭涉  
 湍瀨十步九崎嶇山水何破碎坐令管仲小自  
 覺伯夷隘乃今來中州萬里如一槩回望登原  
 隰桑麻蔚旆旆驪踏清廓過都真歷塊歷歷  
 古戰場俯仰生感慨吾嘗涉重湖東海際南海

茲游冠平生天宇更宏大心與太虛際目空九  
圍內男兒不出戶婦人坐帷蓋反身以自觀須  
彌納一芥以此處生死超然萬形外

滹沱河二首

過了長江與大河橫流數丈絕滹沱蕭王麥飯  
會倉卒回首中天感慨多  
風沙睢水終亡楚草木公山竟蹙秦始信滹沱  
冰合事世間興廢不由人

河間

夜宿河間怡家則翁寓焉因成三絕

空有丹心貫碧霄泮冰立國不崇朝小臣萬死  
無遺憾曾見天家十八朝  
南歸鴈蕩報郎君老子精神健十分不謂瀛洲  
復相見阿戎翻隔萬山雲  
江南車蓋走燕山老子旁觀袖手閒見說新詩  
題甲子桃源元只在人間

保州道中

昨夜渡滹沱今朝望太行白雲何渺渺天地何

茫茫落葉混西風黃塵昏夕陽牛車過不住  
屋行相望小兒倚蹇驢壯士駕乘黃高低葉萬  
頃黑白草千行村落有古風人間無時妝宋遼  
舊界分燕趙古戰場蚩尤亂涿野共工謫幽邦  
郭隗致樂毅荆軻攜舞陽臧盧互反覆安史迭  
披猖山川一今古人物幾興亡江南佔畢人往  
來習羊腸天馬載青蠅電抹馳康莊適從何方  
來如在醉夢鄉感時意踟躕惜往淚淋浪厲階  
起玉環左計由石郎天地行日月萬代垂景光

晝夜果可廢春秋誠荒唐吾生直須臾俯仰際  
八荒來者不可見遠遊賦徬徨

保涿州三詩

趙太祖墓在保州二十九日起至三十

日到

我行保州塞御河直其東山川猶有霧佳氣何  
鬱葱顧我巾車囚厲風轉秋蓬瓣香欲往拜惆  
悵臨長空

樓桑

故宅近涿縣三十里

我過梁城門樓桑在其北元德已千年青煙遠  
故宅道傍爲揮淚徘徊秋風客天下臥龍人多  
少空抱膝

涿鹿

我瞻涿鹿野古來戰蚩尤軒轅此立極玉帛朝  
諸侯歷代遷關河鴈風吹寒秋爾來三百年王  
氣行幽州

過梁門

一金甌在雙雙鐵壁全土花開舊國風絮渡

江前南北分新統江淮號極邊更和天塹失回  
首慘啼鵲

白溝河

昔時張叔夜統兵赴勤王東都一不守羸馬遷  
龍荒適過白溝河裂眦鬚欲張絕粒不遑死仰  
天扼其吭羣臣總奄奄一士垂天光讀史識其  
地撫卷爲淒涼我生何不辰異世忽相望皇圖  
遘陽九天塹漏飛艤引軍詣闕下捧土障瀾狂  
出使義不屈持節還中郎六飛狩南海金鐵將



煌煌武侯空盛心出師驚四方吾屬竟爲虜世  
事吁彼蒼思公有奇節一死何慨慷江淮我分  
地我欲投滄浪滄浪卻不受中原行路長初登  
項籍宮次覽劉季邦涉足河與濟回首嵩與恆  
下車撫梁門上馬指樓桑戴星渡易水慘淡天  
微茫行人爲我言宋遼此分疆懸知公死處爲  
公出涕滂恨不持束芻徘徊官道傍我死還在  
燕烈烈同肝腸今我爲公哀後來誰我傷天地  
垂日月斯人未云亡文武道不墜我輩終堂堂

懷孔明

斜谷事不濟將星殞營中至今出師表讀之淚  
沾胸漢賊明大義赤心貫蒼穹世以成敗論操  
懿眞英雄

懷劉琨

中原昔分蕩壯哉劉越石連踪起幽并隻手扶  
晉室福華天意乖匹磾生鬼蜮公死百世名天  
下分南北

懷祖逖

平生祖豫州白手起大事東門長嘯兒爲遜一  
頭地何哉戴若思中道奮螳臂豪傑事垂成今  
古長短氣

懷顏杲卿

常山義旗奮范陽鯁喉咽胡雛一狼狽六飛西  
入川哥舒降且拜公舌膏戈鋌人世誰不死公  
死千萬年

懷許遠

起師哭立元義氣震天地百戰奮雄姿鸞妾士

揮淚睢陽水東流雙廟垂百世當時令狐潮乃  
爲賊遊說

過雪橋琉璃橋

小橋度雪度琉璃更有清霜滑馬蹄遊子衣裳  
和鐵冷殘星荒店亂鳴雞

和夷齊西山歌

西山之歌曰登彼西山兮採其薇矣以  
暴易暴兮不知其非矣神農虞夏忽焉  
沒兮我安適歸矣吁嗟祖兮命之衰矣

後二千餘年某乃倚歌而和之曰

小雅盡廢兮出車採薇矣戎有中國兮人類非矣明王不興兮吾誰與歸矣抱春秋以沒世兮甚矣吾衰矣

又從而和之曰

彼美人兮西山之薇矣北方之人兮為吾是非矣異域長絕兮不復歸矣鳳不至德之衰矣

幽燕獄中

己卯十月一日至燕越五日罹狴犴有

感而賦

一  
拱璧衣冠十六傳更無一士死君前自慚重趙非九鼎猶幸延韓更數年孟博囊頭真自愛杲卿鈞舌更誰憐人間真有綱常在萬古西山皎月懸

二

直弦不似曲如鈞自古聖賢多被囚命有死時名不死身無憂處道還憂可憐杜宇空流血誰

顧巖顏便斫頭結束長編猶在此竈門婢子幾人羞

三

落落南冠自結纓桁陽臥起影縱橫坐移白日知何世夢斷青燈問幾更國破家亡雙淚暗天荒地老一身輕黃梁得失真成幻五十年前元未生

四

范曄在獄中為士題扇云去白日之皎皎

卽長夜之漫漫

心期耿耿浮雲上身事悠悠落日西千古興亡何限錯百年生死本來齊沙邊莫待悲黃鵠雪裏何須問牧羝此處曾埋雙玉劍虹光夜指楚天低

五

寥陽殿上步黃金一落顛隄地獄深蘇武窖中偏喜臥劉琨囚裏不妨吟生前已見夜叉面死去只因菩薩心萬里風沙知己盡誰人會得廣

陵音

六

亦知夏夏楚囚難爭柰天生一寸丹鐵馬行塵  
南地熱赭衣坐擁北庭寒朝餐淡薄神還爽夜  
睡崎嶇夢自安亡國大夫誰爲傳祗饒野史與  
人看

七

風雪重門老楚囚夢回長夜思悠悠熊魚自古  
無雙得鵠雀如何可共謀萬里山河真墮甌一

家妻子任填溝兒時愛讀忠臣傳不謂身當百

六秋

八

聽著啼鵲淚滿巾國亡家破見忠臣關河歷落  
三生夢風雪飄零萬死身丞相豈能堪獄吏故  
侯安得作園人神農虞夏吾誰適回首西山繼  
絕塵

九

風前舞燈影月下泣霜花鐘信忽然動屋陰俄

又斜闕中聊度歲夢裏尙還家地獄何須問人間見夜叉

十

風霜陰忽忽天地淡悠悠我自操吾語誰來問楚囚寂中惟滅想達處盡忘憂手自韋編在朝聞夕死休

十一

吳殺諸葛恪以蘧篲裹而棄之

環堵塵如屋纍然一故吾解衣烘稚蝨包鎖救

殘鬚坐處心如忘吟餘眼已枯不應畱滯久何日裏蘧篲

十二

浩劫風塵暗衣冠痛百罹靜傳方外學晴寫獄中詩烈士惟名徇真人與物違世間忙會錯認取去來時

十三

儼然楚君子一日造王庭議論探堅白精神入汗青無書求出獄有舌到臨刑宋故忠臣墓真

吾五字銘

十四

宰相目我爲愚

兩月縲囚裏一年憂患餘疏因隨事直忠故有時愚道在事何拙心安體自舒近來都勘破人世只蘧廬

十五

袞衣坐縲綫世事亦堪哀枕外親炊黍鑪邊細劃灰無人淚垂血何地骨生苔風雪江南夢夢

中行探梅

十六

我自憐人醜人方笑我愚身生豫讓癩背發范增疽已媿功臣傳猶堪烈士書衣冠事至此命也欲何如

十七

久已忘榮辱今茲一死生理明心自裕神定氣還清欲了男兒事幾無妻子情出門天地闊一笑暮雲橫

十八 十二月二十日賦

家國哀千古星霜忽一周黃沙漫故道白骨委  
荒邱許遠死何晚李陵生自羞南來冠不改吾  
且任吾囚

十九

念四日俚語謂之小年夜

壯心負光岳病質落幽燕春節前三日江鄉正  
小年歲時有如水風俗不同天家廟荒苔滑誰  
人燒紙錢

二十

無限斜陽故國愁朔風吹馬上幽州天翻地覆  
三生劫歲晚江空萬里囚烈士喪元端不惜達  
人知命復何憂祇應四十三年化兩度無端見  
土牛

文山遇靈陽子談道繫之以詩

昔我愛泉石長揖離公卿結屋青山下咫尺蓬  
與瀛至人不可見世塵忽相嬰業風吹浩劫蝸  
角爭浮名偶逢大呂公如有夙世盟相從語寥



廓俯仰萬慮輕天地不知老日月交其精人一  
陰陽性本來自長生指點虛無間引我歸圓明  
一針透頂門道骨由天成我如一逆旅久欲躡  
屩行聞師此妙訣蘧廬復何情

歲祝犁單閏月赤奮若日焉逢涪灘遇異  
人指示以大光明正法於是死生脫然  
若遺矣賦五言八句

誰知真患難忽悟大光明日出雲俱靜風消水  
自平功名幾滅性忠孝大勞生天下惟豪傑神

仙立地成

己卯歲除有感

歲除破衣裳夜半刺針線遊子長夜思佳人不  
可見草枯稚驢吼燈暗飢鼠現深室閉星斗輕  
裘臥風霰大化忽旋斡浩劫蕩流轉冠履失其  
位侯王化畸賤弓戈叱奇宇刀鋸摧頽弁至性  
詎可遷微軀不可戀真人坐中漠死生一乘傳  
日月行萬古神光索九縣

右自己卯十月一日至歲除所賦當入

獄時望旦夕死不自意蹉跎至今詩凡  
二十餘首明日為商橫執徐歲不知又  
當賦若干首而後絕筆云己卯除日文  
山履善甫題

指南後錄卷二終

指南後錄卷三

予指南後錄第一卷起正月十二日賦  
零丁洋第二卷起八月二十四日發建  
康今第三卷蓋自庚辰元日為始文山  
履善甫序

元日

鐵馬風塵暗金籠日月新衣冠懷故國鼓角泣  
離人自分流年晚不妨吾道春方來有千載兒  
女任悲辛

新年四十五歲

東風昨夜忽相過，天地無情奈老何。  
千載方來那有盡，百年未半已爲多。  
君傳南海長生藥，我愛西山餓死歌。  
泡影生來隨自在，悠悠不管世間魔。

感興

萬里雲山斷客魂，浮雲心事向誰言。  
月侵鄉夢夜推枕，風送牢愁晝掩門。  
蘇子窖中閑日月，石郎家裏舊乾坤。  
朝聞夕死吾何恨，坐把春秋子

細論

正月十三日

去年今日遁匡山，望見龍舟咫尺間。  
海上樓臺俄已變，河陽車馬莫須還。  
可憐羝乳煙橫塞空，想鵲啼月掩關。  
人世流光忽如此，東風吹雪鬢毛斑。

上元懷舊

禁門三五金吾夜，回首青春忽二毛。  
池上昔隨王母宴，斗中今直貴人牢。  
風生江海龍遊遠，月

打百衲金 卷三  
滿關山鶴唳高夢到鈞天燈火闌依然彩筆照宮袍

讀史

自古英雄士還爲薄命人孔明登四十韓信過三旬壯志搖龍虎高辭泣鬼神一朝事千古何用怨青春

幾傷

家國傷冰泮妻孥歎陸沈半生遭萬劫一落下千尋各任汝曹命那知吾輩心人誰無骨肉恨

與海俱深

遣興

一落顛嗟不自由春風相對說牢愁穉驢黑月光中吼飢鼠青燈影下游豈料乾坤真墮甌始知身世是虛舟遙憐海上今塵土百代風流不肯休

又

東風吹草日高眠試把平生細問天燕子愁迷江右月杜鵑聲破洛陽煙何從林下尋元亮只

向夢中作魯連莫笑道人空打坐英雄收斂便  
神仙

四月八日

今朝浴佛舊風流身落山前第一州  
願上瑤桃俄五稔梅中玉果已三周  
人生聚散真成夢世事懽悲一轉頭  
坐對春風開口笑滿懷耿耿復何求

夜起

夢坐東窗月半明此身雖在只堪驚  
一春花裏

離人淚萬里燈前故國情  
龍出想應回海島鴈飛猶未出  
江城客愁多似西山雨一任蕭條白髮生

五月二日生朝

北風吹滿楚冠塵笑捧蟠桃夢裏春  
幾歲已無籠鶴客去年猶有送羊人  
江山如許非吾土宇宙奈何多此身  
不滅不生何許靜中聊且養吾真

端午感興

千金鑄錯百神愁功與當年禹服侔荆棘故宮  
魑魅走空餘揚子水東流

又

當年忠血墮讒波千古荆人祭汨羅風雨天涯  
芳草夢江山如此故鄉何

又

流涕西來恨未銷魚龍寂寞暗風潮楚人猶自  
貪兒戲江上年年奪錦標

見艾有感

過眼驚初夏回頭憶晚春已憐花結子又見艾  
爲人故國丹心老中原白髮新靈脩那解化清  
夢楚江濱

自歎

綠槐雲影弄黃昏月照牢愁半掩門一片心如  
千片碎十分鬢有二分存沙邊鴻鵠長回首江  
上杜鵑空斷魂豎子溷人渾不省紅纓白馬意  
軒軒

自遣

詩餘眠白日館後坐清風萬事乘除裏平生寵辱中心無隨境變意自與天通莫笑邯鄲夢惺惺更是空

自述

赤鳥登黃道朱旗上紫垣有心扶日月無力報乾坤往事飛鴻渺新愁落照昏千年滄海上精衛是吾魂

不睡

終夕起推枕五更聞打鐘精神入朱鳥形影落

盧龍弭節蓬萊島揚旗太華峰奔馳竟何事回首謝橋松

己卯五月十八日子以楚囚過曹溪宿寺

門下六祖禪師真身頃爲亂兵竅其胸探其心肝蓋意其有寶故禍至此予以業緣所驅落在劫火不謂真佛亦不免焉今年今月今日回首念賦五十六字

去年五月十八日高臥曹溪松下風佛若無身

那見患我因有色故成空忘形萬里黃塵外回  
首一年清夢中夜看月華明似鏡只應心事略  
相同

先太師忌日

太師騎汗漫一紀似跳丸弟妹俱成立家鄉忍  
破殘衣冠晨月暗墳墓夜風寒萬里逢先忌無  
言彈淚彈

七夕

大地風塵惡長天歲月奔憂來渾是 夢破與

誰言緜鶴空回首河牛暗斷魂吾今拙又拙無  
復問天孫

有感

石郎草草割山川一落人手三百年八州風雨  
暗連天三皇五帝如飛煙人人野祭伊水邊春  
秋斷爛不復傳白頭潦倒今魯連夜深危坐日  
晏眠

聞季方至

去年我別旋出嶺今年汝來亦至燕弟兄一囚



一乘馬同父同母不同天可憐骨肉相聚散人生不滿五十年三仁生死各有意悠悠白日橫蒼烟

九月七日是爲先母兩國夫人大祥之辰

某爲子不孝南望嗚咽爲哀辭章一首

前年惠州哭母斂去年邳州哭母葬今年飄泊在何處燕山獄裏菊花時哀哀玉化如昨日兩度周星俄箭疾人間送死一大事生兒富貴不得力祗今誰人守墳墓零落瘴鄉一堆土大兒

狼狽勿復道下有二兒并二女一兒一女亦在燕佛廬設供捐金錢一兒一女家下祭病脫麻衣日晏眠夜來我夢歸故國忽然海上見顏色一聲雞叫淚滿牀化爲清血衣裳溼當年爨緯意謂何親曾撫我夜枕戈古來全忠不全孝世事至此甘滂沱夫人開國分齊魏生榮死哀宋天地悠悠家破與國亡平生無憾惟此事二郎已作門戶謀江南葬母麥滿舟不知何日歸兄骨狐死猶應正首邱

重陽

風捲平塵弄曉寒  
天涯流落寸心丹  
去年醉與茱萸別  
不把今年作健看

去年十月九日子至北庭  
今周星不死爲

賦長句

君不見常山太守罵羯奴  
天津橋上血函胡  
又不見睢陽將軍怒切齒  
三十六人同日死  
去年長至前一日朔庭呼我  
又不屈丈夫開口卽見  
膽意謂生死在頃刻  
赭衣冉冉生蒼苔  
書雲時

節忽復來鬼影青燈照  
孤坐夢啼花血丹心破  
只今便作渭水囚  
食粟已是西山羞  
悔不當年跳東海  
空有魯連心獨在

戊寅臘月二十日行府敗被執於今二年

矣感懷八句

橫磨十萬坐無謀  
回首蹉跎海上州  
太傅祇圖和藥了  
將軍便謂斷頭休  
乾坤顛倒真千劫  
身世雷連復二周一死到今  
悠悠佛空窗淡月夜

除夜

門掩西山黑孤燈伴不眠故鄉在何處今夕是  
窮年住世真無繫為囚已自然勞勞空歲月得  
死似登仙  
歲暮難為客天涯況是囚乾坤還幾大歲月忽  
如流夢過元無夢憂多更不憂屠蘇兒女態肯  
作百年謀

指南後錄卷三終

鄧中齋悼亡詩

雞箔但添

新冤結鹿門那復舊提攜無腸可忍生前痛有  
耳難聞火後啼悶欲絕來還自醒要收汝骨到

江西

半月飢疲更夜行爭信人人

俱合死細思箇箇可憐生危塗轉足神難靠冤  
氣橫空斗失明二十一年如一夢此生懷抱幾  
時平

前生罪業想河沙誤汝縱橫死海涯歷歷不堪  
尋往夢紛紛忽似落朝華汝宜依佛先登岸我  
已爲僧未出家他日因緣如未斷共生淨土碧  
蓮花

右指南錄三卷舊本出於尙寶楊叔簡家鄉兄  
兵科都給事葉與中見之欲自錄一本借至而  
有山西之行且不欲瀆於凡手因托於予予於  
書甚懶然覩  
文山之詞而又當惜別之際遂爲書此若字畫  
之闕誤乃仍其舊云景泰壬申四月十八日吳  
人顧珣識



